

## **Katersugaasiveqarneq pillugu Inatsisartut inatsisaat nr. 8, 3. juni 2015-imeersoq**

### **Kapitali 1**

#### *Siunertaa nassuiarneralu*

§ 1. Kalaallit Nunaata piorsarsimassutsikkut kingornussaasa tigussaasut tigussaannngitsullu tam-matsaalineqarnissaat Kalaallillu Nunaanni katersugaasiveqarnikkut sulinerup suleqatigiinnerullu si-uarsarneqarnissaa Inatsisartut inatsisaata siunertarai.

*Imm. 2.* Piorsarsimassutsikkut kingornussat tigussaasut tassaapput suulluunniit nikisinneqarsin-naasut, illuutit aamma piorsarsimassutsikkut ingerlatsiviit, inuiaqatigiit ineriartornerannut taassuma-luunniit ilaatut ersiutaasut.

*Imm. 3.* Piorsarsimassutsikkut kingornussat tigussaannngitsut tassaapput pisaatsit, isummat, taa-guutit, ilisimasat, piginnaasat, taamatullu aamma atortut, pigisat, assassorluni pilersitat piorsarsi-massutsikkulluunniit ataatsimoorfiit, inuiaqatigiinnit, inunnit ataatsimoortunit, ilaannikkullu aamma inunnit ataasiakkaanit piorsarsimassutsikkut kingornussat ilaattut akuerisaasut.

§ 2. Kalaallit Nunaanni katersugaasiveqarnermut ilaapput Nunatta Katersugaasivia Allagaateqarfi-  
alu, katersugaasiviit akuerisaasut, tak. kapitali 3, aamma Katersugaasiveqarnermut Ataatsimiititali-  
aq.

§ 3. Nalunaarsuineq, katersuineq, toqqortarinninneq, ilisimatusarneq, ineriartortitsineq paasisanil-  
lu ingerlatitseqqittarneq aqqutigalugit katersugaasiviit suliassaraat:

- 1) Kalaallit Nunaata piorsarsimassutsikkut kingornussarsiaasa tammatsaalineqarnissaat sulissutigis-sallugu,
- 2) Kalaallit Nunaata piorsarsimassutsikkut pinngortitamullu tunngasutigut oqaluttuarisaanera paasi-niassallugu, tak. imm. 2 aamma 3,
- 3) katersugaatit tamanut takusassiarissallugit, aamma
- 4) katersugaatit ilisimatusarnermi atugassannngortissallugit, ilisimatusarnermilu paasisanit ilisimasat siammartissallugit.

*Imm. 2.* Piorsarsimassutsikkut oqaluttuarisaanermik paasiniaanermi ilaapput inuit inuuniarnermin-ni qangarsuaaniilli maannamut atugaasa allanngoriartorsimanerat, allanngorarsimanerat atajuarsi-manerallu.

*Imm. 3.* Pinngortitaq pillugu oqaluttuarisaanermik paasiniaanermi ilaapput pinngortitaq, ineriartorsimanera, maannakkut avatangiisiusut aammalu inunnut sunniuteqarsimanerat.

*Imm. 4.* Ataatsimoortumik suliassa qarfinni katersugaasiviit suleqatigiissapput, suliassat imm. 1-imi taaneqartut isumagineqarnerisa siuarsarneqarnissaat siunertaralugu.

*Imm. 5.* Katersugaasiviit akisussaaffeqarfimminni killissarititaasut iluanni, oqartussanik eqqissisi-matitsinermik, piorsarsimassutsikkut kingornussanik allatut illersuineramik sanaartugassanillu pilersaarusionermik suliqaartunik suleqateqassapput.

### **Kapitali 2**

#### *Nunatta Katersugaasivia Allagaateqarfialu*

§ 4. Nunatta Katersugaasivia Allagaateqarfialu Namminersorlutik Oqartussat pilersippaat ingerlanneqarneranullu akisussaallutik.

*Imm. 2.* Nunatta Katersugaasivia Allagaateqarfialu pisortamit Naalakkersuisunit atorfinitsinneqartumit siulersorneqassaaq.

§ 5. Nunami tamarmi suliassat § 3, imm. 1-imi taaneqartut kiisalu suliassat inatsisit allat tunngavigalugit suliassiissutigineqartut Nunatta Katersugaasiviata Allagaateqarfialu sularissavai.

*Imm. 2.* Ukiuni sisamani sulinissamut pilersarusiaq Nunatta Katersugaasiviata Allagaateqarfialu sularissavavaa, taannalu ilisimatitsissutitut Naalakkersuisunut, sumiiffinni katersugaasiviit kattuffiannut, NUKAKA-mut Katersugaasiveqarnermullu Ataatsimiititaliamut nassiunneqartassaaq.

*Imm. 3.* Nunatta Katersugaasivia Allagaateqarfialu sulinini pillugu ukiumoortumik nalunaarsior-tassaaq, taannalu Naalakkersuisunut akuerisassanngorlugu Katersugaasiveqarnermullu Ataatsimiititaliamut aamma sumiiffinni katersugaasiviit kattuffiannut NUKAKA-mut ilisimatitsissutitut nassiunneqartassaaq.

§ 6. Nunatta Katersugaasiviata Allagaateqarfialu itsarnisat ilisimaneqartut Inatsisartut inatsisaanni ilaatinneqartut tamaasa, matumani aamma nunatsinni eriagisassat pinngortitameersut, nunatsinni eriagisassat itsarnisat pigisallu immikkut ittumik soqutiginaateqartut nalilerneqartut nalunaarsussavai.

*Imm. 2.* Nunatta Katersugaasiviata Allagaateqarfialu piorsarsimassutsikkut kingornussat tigussaangitsut Kalaallit Nunaanniittut suuneri inuiaqatigiit, inuit ataatsimoortut kattuffiillu attuumassuteqartut peqataatillugit nalunaarsorlugillu nassuiassavai, taakkulu allattorsimaffiannik ingerlaavartumik nutarterissalluni.

*Imm. 3.* Nunatta Katersugaasivia Allagaateqarfialu Kalaallit Nunaanni piorsarsimassutsikkut kingornussat tigussaangitsut illersorneqarnissaannut akisussaasuvoq.

§ 7. Katersugaatit takussutissat eqqortumik takutitsisuuniartussat Nunatta Katersugaasiviata Allagaateqarfialu katersussavai, katersugaatinut ilanngutissavai tammatsaalissallugillu.

*Imm. 2.* Pigisat ataasiakkaat imaluunniit katersugaatit ilaat katersugaasivinni kapitali 3 tunngavigalugu akuerisaasuni uninngasuutigineqarsinnaapput. Pigisat uninngasuutigineqartut Katersugaasivimmuut sukkulluunniit uterteqquneqarsinnaapput.

*Imm. 3.* Pisut immikkut ittut iluanni pisortap inassuteqarneratigut Naalakkersuisullu akuersissuteqarnerisigut Nunatta Katersugaasiviata Allagaateqarfialu katersugaatit ilaat katersugaatinit immikkoortissinnaavai.

*Imm. 4.* Pigisat ilaat katersugaatinit immikkoortinneqartut katersugaasivinnut akuerineqarsimasuunnaq tunniunneqarsinnaapput. Pigisat pigisalluunniit pineqartut katersugaasiviit arlaannaanni-luunniit tigunganeqanngippata immikkoortinneqartut allanut tunniunneqarnissaat atortussaajun-naarsinneqarnissaalluunniit Naalakkersuisut akuersissutigisinnaavaat.

§ 8. Nunatta Katersugaasiviata Allagaateqarfialu piorsarsimassutsikkut oqaluttuarisaaneq pillugu ilisimatusarneq, matumani aamma Kalaallit Nunaanni itsarnisarsiornermik assaalluni misissuine-

rit ingerlatissavai, paasisanillu ingerlatitseqqittarnermigut kalaallit piorsarsimassutsikkut kingornusarsiaannik tigussaasunik tigussaannigitsunillu aammalu Kalaallit Nunaata piorsarsimassutikkut ineriartorneranik ilisimasat siammartissallugit.

**§ 9.** Katersugaatit Nunatta Katersugaasiviata Allagaateqarfiatalu ilisimatusarnermut atugassanngortissavai. Tassunga atatillugu aningaasartuutit katersugaatinik atuerusuttunit akilerneqartussanngortinneqarsinnaapput.

*Imm. 2.* Katersugaatit piffissani siumut aalajangerneqareersimasuni tamanit takuneqarsinnaatinneqassapput.

*Imm. 3.* Nunatta Katersugaasivia Allagaateqarfialu katersugaasivinnut takusaanermi akiliuteqartitsisinnaavoq.

*Imm. 4.* Ilinniagaqarfiit atuartitsinermut ilagitillugu katersugaasivinnut takusaatitsisut akiliuteqarnissaat piumasarineqarsinnaanngilaq.

**§ 10.** Nunatta Katersugaasiviata Allagaateqarfiatalu katersugaasiviit akuerisaasut suliassani katersugaasivinnut tunngasuni siunnersortassavai.

*Imm. 2.* Suliat teknikkikkullu periarfissat tamanna ajornartinnngikkaangassuk Nunatta Katersugaasivia Allagaateqarfialu katersugaasiviit akuerisaasut pigisaannik immikkut aanaveersaanermik ingerlataqartassaaq. Tamatumunnga aningaasartuutit katersugaasivinnit pineqartunit akilerneqartassapput.

*Imm. 3.* Nunatta Katersugaasiviata Allagaateqarfiatalu katersugaasivinnut akuerisaasunut pisussaaffii, matumani aamma siunnersorneqarnermut tunngatillugu aningaasartuutinik akiliisarneq pillugit maleruagassat erseqqinnerusut Naalakkersuisut aalajangersarsinnaavaat.

**§ 11.** Katersugaasiviit akuerisaasut katersugaataasa toqqortarineqarnerat Nunatta Katersugaasiviata Allagaateqarfiatalu nakkutigissavaa.

**§ 12.** Nunatta Katersugaasivia Allagaateqarfialu nunat tamat katersugaasiveqarnikkut suleqatigiinneranni Kalaallit Nunaanni katersugaasiviit sinnerlugit peqataasassaaq.

*Imm. 2.* Piorsarsimassutsikkut oqaluttuarisaanermi itsarnisat Danmarkimut nunanulluunniit allanut anninneqarsimasut utertinneqarnissaat pillugu Nunatta Katersugaasivia Allagaateqarfialu Kalaallit Nunaanni katersugaasiviit sinnerlugit isumaqatigiinniuteqartuusassaaq.

### **Kapitali 3**

#### *Katersugaasiviit akuerisaasut*

**§ 13.** Naalakkersuisut katersugaasivik aalajangersimasooq suliassat § 3, imm. 1-imi erseqqinnerusumik taaneqartut ilaannik, nunap ilaani aalajangersimasumi sammisassanulluunniit aalajangersimasunut tunngasuni suliarineqartussanik isumaginnittussatut, Katersugaasiveqarnermut Ataatsimiititaliap inassuteqarneratigut akuerisinnaavaat.

*Imm. 2.* Piorsarsimassutsikkut siammarterisumik suliniuteqarnerit allat katersugaasiviup akuerisaasup sulineranut ilaatinneqarsinnaapput, matumani ilanngullugu katersugaasiviup suliffeqarfinnik piorsarsimassutsikkut siammarterinermik suliniuteqartunik allanik suleqateqarsinnaanera.

§ 14. § 13, imm. 1 tunngavigalugu akuerineqassagaanni piumasaqaatit makku eqqortinneqarsimasariaqarput:

- 1) Katersugaasivik kommunimit kommunilluunniit suleqatigiiffiannit pigineqassaaq, imminut pigisuulluni imaluunniit peqatigiiffimmit katersugaasiviup ingerlanneqarnissaanik siunertaqartumit pigineqassalluni.
- 2) Kalaallit Nunaata piorsarsimassutsikkut kingornussarsiaasa tigussaasut tigussaanningsulluunniit ilaat erseqqinnerusumik allaaserineqarsimasut, katersugaasiviilluunniit suliassaattut taaneqarsimasut allat katersugaasiviup akisussaaffigissavai.
- 3) Katersugaasivimmuut ileqqoreqqusat katersugaasiviup aqqa, piginittuussutsinut tunngasut, siunertaa, akisussaaffeqarfii, siulersuisuisa katitigaanerat, siulersuisuinik qinersisarneq, initai, missingersuutai, naatsorsuutai, kukkunersuisarneq, ileqqoreqqusat allanngortinneqarnissaannut periarfissat atorunnaarsinneqassappallu qanoq iliortoqarnissaa pillugit aalajangersakkanik imaqqassapput.
- 4) Katersugaasivik naammaginatsumik pitsaassuseqassaaq, katersugaasiviup katersugaataasa illersomeqarsinnaasumik toqqortarinneqarnissaannik qulakkeerisumik, aningaasatigullu tunngavissaqassalluni pitsaassuttip ataavartinneqarnissaanut periarfissiisumik.
- 5) Katersugaasiviup pisortaa katersugaasivimmi sulineramik ilinniagaqarsimasuussaaq, katersugaasivimmilluunniit siulersuineramik ingerlatsinissamat allatigut piukkunnaateqartuussalluni.
- 6) Katersugaatit piffissani siumut aalajangereersimasuni tamanit takusarneqarsinnaatinneqassapput, katersugaasivillu takusaasunik akiliisitsisinnaavoq, kisiannili ilinniarfiit atuartitsinermut atatillugu takusaatitsisut akiliisittassanagit.

§ 15. Ukiuni sisamani sulinissamat pilersaarussiaq katersugaasiviup suliarisassavaa, taannalu kommunimut katersugaasivimmik ingerlatsisuusumut tapiissuteqartartumulluunniit, Nunatta Katersugaasivianut Allagaateqarfianullu aamma Katersugaasiveqarnermut Ataatsimiititaliamut ilisimatitsissutitut nassiunneqartassaaq.

*Imm. 2.* Katersugaasivik ukiumoortumik naatsorsuusiortassaaq, missingersuutitut siunnersuusiortassalluni katersugaasivittullu sulinini pillugu nalunaarusiortassalluni, taakkulu kommunimut katersugaasivimmik ingerlatsisuusumut tapiissuteqartartumulluunniit akuerisassanngorlugit nassiunneqartassapput. Katersugaasivik kommunimit tapiiffigineqartanngippat naatsorsuutit, missingersuutitut siunnersuutit nalunaarusiarlu katersugaasiviup ileqqoreqqusaani aalajangersakkat malilugit akuerineqassapput, tak. § 14, nr. 3.

*Imm. 3.* Katersugaasiviup ukiumoortumik naatsorsuutai, missingersuutitut siunnersuutai, katersugaasiviullu sulinini pillugu nalunaarusiaa, tak. imm. 2, Naalackersuisunut, Nunatta Katersugaasivianut Allagaateqarfianullu kiisalu Katersugaasiveqarnermut Ataatsimiititaliamut ilisimatitsissutitut nassiunneqartassapput.

§ 16. Nassaat kapitali 5-imi pineqartunut ilaatinneqartut katersugaasivinnit akuerisaasunit Nunatta Katersugaasivianut Allagaateqarfianullu nalunaarutigineqartassapput.

§ 17. Katersugaasiviup akuerisaasup katersugaataasa ilaat taamaallaat katersugaasivinnut akuerisaasunut allanut imaluunniit Nunatta Katersugaasivianut Allagaateqarfianullu tunniunneqarsinnaapput uninngasuutigitinneqarsinnaallutilluunniit. Pigisarli pigisalluunniit pineqartut katersugaasiviit akuerisaasut arlaannaannilluunniit imaluunniit Nunatta Katersugaasiviata Allagaateqarfialu tigujumangippassuk immikkoortinneqartut allanut tunniunneqarsinnaapput atortussaajunnaarsinneqarsinnaallutilluunniit.

§ 18. Katersugaasiviup § 14-imi piumasqaataasut eqqortikkunnaarpagit imaluunniit §§-ini 15-imiit 17-imit naapertorlugit pisussaaffini sumiginnarpagit, akuersissut Naalakkersuisut namminneq suliniuteqarnerisigut imaluunniit Katersugaasiveqarnermut Ataatsimiititaliap nalunaaruteqarneratigut atorunnaarsinneqarsinnaavoq. Atorunnaarsitsinnginnermi Katersugaasiveqarnermut Ataatsimiititaliaq oqaaseqaateqartinneqqaassaaq.

*Imm. 2.* Katersugaasiviup pissutsit imm. 1 naapertorlugu Naalakkersuisut aalajangersimasumik piffissaliussaata iluani aqqitassat iluarsinngippagit akuersissut atorunnaarsinneqassaaq katersugaasiviullu sulinini unitsittariaqassallugu. Piffissaliussap aalajangiunneqannginnerani Katersugaasiveqarnermut Ataatsimiititaliaq tamanna pillugu oqaaseqaateqqaassaaq.

§ 19. Katersugaasivik sulinerminik unitsitsisariaqarpat katersugaasiviup katersugaataasa qanoq pineqarnissaat Nunatta Katersugaasiviata Allagaateqarfialu aalajangiivigissavaa.

*Imm. 2.* Unitsitsineq katersugaasiviup akuersissummik arsaagaaneranik pissuteqarpat imm. 1 malillugu aalajangiineq imaassaaq, katersugaasivik suliaminik unitsitsisoq akuersissummik arsaaganerminiit ukiut marluk qaangiutinnginneranni akuerisaaqqinnermigut periarfissaqassalluni katersugaatiminut oqaasissaqartuuleqqinnissamut.

## **Kapitali 4**

### *Katersugaasiveqarnermut Ataatsimiititaliaq*

§ 20. Katersugaasiveqarnermut Ataatsimiititaliaq tallimanik ilaasortalik, taakkunungalu sinniussalik Naalakkersuisut pilersissavaat, taakkunangalu:

- 1) ilaasortaq ataaseq sinniisussaalu Nunatta Katersugaasivianit Allagaateqarfianillu toqqagaassapput,
- 2) ilaasortaq ataaseq sinniisussaalu katersugaasivinni akuerisaasuni pisortat akornanneersut Nunat-sinni Katersugaasiviit Kattuffiannit, NUKAKA-mit toqqagaassapput,
- 3) ilaasortaq ataaseq sinniisussaalu katersugaasivinni akuerisaasuni siulersuisut akornanneersut Sumiiffinni katersugaasiviit kattuffiannit, NUKAKA-mit toqqagaassapput,
- 4) ilaasortaq ataaseq sinniisussaalu Kalaallit Nunaanni Kommunit Kattuffiannit, KANUKOKA-mit toqqagaassapput, aamma
- 5) ilaasortaq ataaseq sinniisussaalu Ilisimatusarfimmit toqqagaassapput.

*Imm. 2.* Katersugaasiveqarnermut Ataatsimiititaliami ilaasortat qaammatisiutit malillugit ukiuni sisamani atasussanngorlugit ivertinneqartassapput. Toqqagaqqittoqarsinnaavoq.

*Imm. 3.* Katersugaasiveqarnermut Ataatsimiititaliap siulittaasussani taassumalu tullissaa ilaasortami akornannit qinertassavai.

*Imm. 4.* Katersugaasiveqarnermut Ataatsimiititaliap suleriaasissani nammineq aalajangersartassavaa.

**§ 21.** Katersugaasiveqarnermut Ataatsimiititaliap allattoqarfeqartinnera Nunatta Katersugaasivianit Allagaateqarfianillu isumagineqassaaq, taanna aamma aalajangersimasumik allatseqartitsisuusalluni. Allattoqarfiup suliassanik ingerlatsinera Nunatta Katersugaasiviata Allagaateqarfialu sulineranit immikkoortisimaneqassaaq.

**§ 22.** Katersugaasiveqarnermut Ataatsimiititaliap suliassarai:

- 1) katersugaasivinnut nuna tamakkerlugu suleqatigiiffiussalluni,
- 2) suliassani katersugaasiveqarnermut tunngasuni Naalakkersuisut pisortallu oqartussat allat siunnersuisuuffigissallugit,
- 3) katersugaasiviit akuerineqarnissaat inassuteqaatigisassallugu, tak. § 13, aamma
- 4) katersugaasiviup akuerineqarnissamut piumasaqaatit eqqortikkunnaarai, tak. § 14, imaluunniit §§-it 15-imiit 17-imut malillugit pisussaaffini sumiginnarai paasiguniuk Naalakkersuisunut nalunaaruteqassalluni.

**§ 23.** Katersugaasiveqarnermut Ataatsimiititaliaq suliani pillugit ukiumoortumik nalunaarusiortassaaq, taannalu Naalakkersuisunut, Nunatta Katersugaasivianut Allagaateqarfianullu kiisalu katersugaasivinnut akuerisaasunut ilisimatitsissutitut nassiunneqartassaaq.

## **Kapitali 5**

### *Itsarnisanik innarlitsaaliineq*

#### *Nassaat*

**§ 24.** Itsarnisat Kalaallit Nunaanni nassaarineqartut, kimilluunniillu uppernarsaasikkamik piginittuuffiginiarneqarsinnaanngitsut nunatsinni eriagisassaapput pinngortitameersut, tassaagunik:

- 1) sumit naleqartumit sanaat imaluunniit piorsarsimassutsikkut oqaluttuarisaanermut immikkut pingaaruteqartut imaluunniit
- 2) umiarsuit umiiarnikut, umiarsuit usii umiarsuillu umiiarnikut taamaattut ilamerngi ukiut 100-t sinnerlugit matuma siornatigut annaasaasorisat, inunnit danskisut innuttaassuseqartunit Kalaallit Nunaanni aalajangersimasumik najugaqartunit Kalaallilluunniit Nunaanniikkallartunit imaluunniit angallammit Kalaallit Nunaanni angerlarsimaffeqartumit danskit nalunaarsuiffianni nalunaarsorneqarsimasumit immap itisuup naqqani nassaarineqarsimasut.

*Imm. 2.* Nassaat itsarnisat immap itisuup naqqani nassaarineqarsimasut, matumani aamma umiarsuit umiiarnikut, umiarsuit usii umiarsuillu umiiarnikut taamaattut ilamerngi ukiut 100-t inorlugit matuma siornatigut annaasat nunatsinni eriagisassatut pinngortitameersutut nassaatut isiqarneqarnissaat Naalakkersuisut aalajangersinnaavaat.

*Imm. 3.* Nasaanut imm. 1, nr. 1-imi taaneqartunut aamma ilaapput nassaat imartap killeqarfiata iluaniittut tassaniissimasulluunniit.

*Imm. 4.* Immap itisuup naqqa, tak. imm. 1, nr. 2 aamma imm. 2, tassaavoq nunap inatsisitigut oqartussaaffiata killingata avataani immap naqqa nunalu ataaniittoq.

**§ 25.** Itsarnisat Kalaallit Nunaanni nassaarineqartut kimilluunniit uppersaasikkamik piginnittuuffiginiarneqarsinnaanngitsut tassaapput nunatsinni eriajisassat itsarnisat, taakku tassaagunik naasut uumasulluunniit ujaranngorsimasut ujaranngulersulluunniit, imaluunniit suna nunap sana-neqaataanit pinngortoq ilisimatuuussutsikkullu soqutiginaateqarlunnartoq imaluunniit saq-qummersissallugu soqutiginaateqartoq.

*Imm. 2.* Nassaat imartap killeqarfiata iluaniittut tassaniissimasulluunniit nasaanut imm. 1-imi taaneqartunut ilaapput.

**§ 26.** Nassaat §§-ini 24-mi 25-milu pineqartunut ilaatinneqanngitsut, kalaallilli piorsarsimassutsikkut oqaluttuarisaanerisa ilaannik pingaaruteqartunik takussutissiisut Nunatta Katersugaasivianit Allagaateqarfianillu immikkut soqutiginaateqartutut isigalugit nalilerneqarsinnaapput.

**§ 27.** Nunatsinni eriajisassat pinngortitameersut, tak. § 24, aamma nunatsinni eriajisassat itsarnisat, tak. § 25, Namminersorlutik Oqartussanit pigineqarput.

*Imm. 2.* Nassaat soqutiginaateqartutut nalilerneqarsimasut, tak. § 26, piginnitsiminnit pigineqarput.

*Imm. 3.* Nasaanik § 26 naapertorlugu soqutiginaateqartutut nalilerneqarsimasunik piginnittup piginnittuussutsimut tunngasut toqqortarineqarfiallu allannguuteqartinniarunigit tamanna Nunatta Katersugaasivianut Allagaateqarfianullu ilisimatitsissutigissavaa.

*Imm. 4.* Nassaat § 26 naapertorlugu soqutiginaateqartutut nalilerneqarsimasut tuniniarneqarpata taakku tuniniarneranni akiinik akilersillugit Namminersorlutik Oqartussanut neqeroorutigineqaqqa-assapput. Tamanut ammasumik kaattaassisitsinissamik eqqarsaateqarnermi piginnittup tamanna pillugu Nunatta Katersugaasivia Allagaateqarfialu ilisimatittassavaa.

**§ 28.** Kinaluunniit itsarnisanik nassaartoq, itsarnisanilluunniit taamaattunik pigisaqalersoq taman-na pillugu Nunatta Katersugaasivianut Allagaateqarfianullu imaluunniit katersugaasiviit akuerisassut arlaannut pinasuartumik nalunaaruteqassaaq. Tamanna aamma atuuppoq nasaanut imartap killeqarfiata iluaniittunut tassaniissimasunulluunniit, aamma umiarsuarnut umiarnikunut, umiarsuit usiunut umiarsuillu umiarnikut taamaattut ilamernginut, inunmit danskisut innuttaassuseqartunit Kalaallit Nunaanni aalajangersimasumik najugaqartunit Kalaallilluunniit Nunaanniikkallartunit imaluunniit angallammit Kalaallit Nunaanni angerlarsimaffeqartumit danskit nalunaarsuiffianni nalunaarsorneqarsimasumit immap itisuup naqqani nassaarineqarsimasunut.

*Imm. 2.* Nassaat itsarnisat akornuserneqassanngillat. Taamaattorli nassaat ajoquserneqariaannaappata aserorneqariaannaappataluunniit nassaartup nassaani toqqortarigallagassanngorlugit nassarsinnaavai, taamaattoq tak. imm. 3. Nassaat isumannaarneqarnissaannut toqqortarineqarnerannullu pisariaqarsimasumut nassaartup aningaasartuutai naleqquttumik amerlassusillit Nunatta Katersugaasiviata Allagaateqarfialu taarserlugit akilissavai, taamaattoq tak. imm. 4.

*Imm. 3.* Umiarsuit umiarnikut, umiarsuit usii umiarsuillu umiarnikut taamaattut ilamerngi immap itisuup naqqani nassaarineqarsimasut, kimilluunniillu uppersaasikkamik piginnittuuffiginiarneqarsinnaanngitsut Nunatta Katersugaasivia Allagaateqarfialu taamaaliornissamut akuerseqqaartinnagu allanngortinneqassanngillat. Kialuunniit nasaanik taamaattunik qaqitsisup nassaamilluunniit taamaattumik pigisaqalersup nassaaq pinasuartumik Nunatta Katersugaasivianut Allagaateqarfianullu tunniutissavaa. Qaqitsisoq qaqitsinermut akissarsinissamik piumasaqarsinnaanngilaq.

*Imm. 4.* Inuit danskisut innuttaassuseqartut Kalaallit Nunaanni aalajangersimasumik najugallit tasaniikkallartulluunniit aamma inatsisit naapertorlugit inatsisitigut pisussaataasut Kalaallit Nunaanni angerlarsimaffeqartut piginnittoq taamaaliornissamut akuerseqqaartinnagu umiarsuarnik umiarnikut, umiarsuit usiiniq umiarsuillu umiarnikut taamaattut ilamernginik immap itisuup naqqani nassaarineqarsimasunik, aammalu Namminersorlutik Oqartussanit pigineqaratik allanit pigineqartunik allanngortitsissanngillat allanngortitsinissamilluunniit sulissuteqassanatik.

§ 29. Nunatta Katersugaasiviata Allagaateqarfialu nalunaaruteqarneq naapertorlugu, tak. § 28, imm. 1, aalajangissavaa pineqartoq tassaansoq nunatsinni eriagisassat pinngortitameersut, nunatsinni eriagisassat itsarnisat imaluunniit pigisaq immikkut soqutiginaatik.

*Imm. 2.* Nunatta Katersugaasivia Allagaateqarfialu naliliippat pineqartoq tassaasoq nunatsinni eriagisassat pinngortitameersut, nunatsinni eriagisassat itsarnisat, taava nassaartoq pigisamilluunniit pigisaqalersimasoq taassuma katersugaasivimmuut pinasuartumik tunniunnissaanut pisussaavoq. Nunatta Katersugaasivia Allagaateqarfialu taassuma peqatigisaanik aalajangiissaaq pigisaq qanoq toqqortarineqassanersoq.

§ 30. Qaqutigoorluinnartunik piorsarsimassutsikkullu oqaluttuarisaanermut pingaaruteqarlunartunik nassaartoqartillugu Naalakkersuisut nassaartoq, Nunatta Katersugaasiviata Allagaateqarfialu oqaaseqaateqareerneratigut akissarsisissinnaavaat.

§ 31. Itsarnisat illersorneqarnissaat pillugu, matumani aamma nassaat nalunaarutigineqarnissaat, toqqortarineqarnissaat tunniunneqarnissaallu pillugit maleruagassat erseqqinnerusut Naalakkersuisut aalajangersarsinnaavaat.

#### *Pissarsineq annissuinerlu*

§ 32. Nassaaq nunamit allamit, nunami tassani inatsisinik unioqutitsilluni anninneqarsimappat, taamaaliornierlu nunat tamat isumaqatigiissutaanni nunap pineqartup Danmarkillu atsioqataaffigisimasaanni pineqartunut ilaappat katersugaasivik nassaamik taamaattumik pissarsissanngilaq.

*Imm. 2.* Pissarsineq imm. 1-imut akerliusumik pisimappat utertitsineq, nunat tamat isumaqatigiissutaat imm. 1-imi taaneqartoq naapertorlugu pissaq.

§ 33. Nassaat kalaallinit suliarineqarsimasut 1945-p siornaneersut, nassaallu § 26 tunngavigalugu immikkut soqutiginaateqartutut nalilerneqarsimasut Nunatta Katersugaasivia Allagaateqarfialu akuersiseqqaartinnagu nunanut allanut anninneqarsinnaanngillat.



*Imm. 2.* Nassaat nunanut allanut annisissallugit kissaatigineqartut pisoqaassusii nalornisoornartoqartillugit Nunatta Katersugaasivianit Allagaateqarfianillu paasiniarneqartassapput.

*Imm. 3.* Pisuni immikkut ittuni piffissami aalajangersimasumik sivisussusilikkami annissinermut akuersissutip atuunnissaa nalunaarutigineqarsinnaavoq.

**§ 34.** § 33, imm. 1 tunngavigalugu annissinissamut akuersissuteqartoqanngippat nassaat taakku sumiluunniit tuniniarneqarunik akigisinnaasaannik akilerlugit Namminersorlutik Oqartussanit tigu-neqarnissaat nassaanik taamaattunik piginnittup piumasarisinnaavaa.

*Imm. 2.* Sulianik ilisimasallit naliliisereerlugit, matumani Nunatta Katersugaasiviata Allagaateqarfiatalu oqaaseqaateqartinneqarnera ilanngullugu, akigitinneqartussa q Naalakkersuisunit aalajangersarneqassaaq.

## **Kapitali 6**

### *Aningaasalersuineq tapiissuteqartarnerlu*

**§ 35.** Nunatta Katersugaasiviata Allagaateqarfiatalu sulinera nunatta karsianit tapiissutitigut, avataanit tapiissutitigut aamma kiffartuussinernik il.il. tunisaqartarnikkut aningaasalersorneqassaaq.

*Imm. 2.* Nunatta Katersugaasivianut Allagaateqarfianullu nunatta karsiata tapiissutigisartagai uki-umoortumik aningaasaliissutinut inatsisitigoortumik aalajangersarneqartassapput.

**§ 36.** Naalakkersuisut aamma kommunalbestyrelsi sumiiffinni katersugaasivinnut tapiissuteqarsinnaapput.

## **Kapitali 7**

### *Naammagittaalliuuteqartarnek pineqaatissiisinaanermullu aalajangersakkat*

**§ 37.** Nunatta Katersugaasiviata Allagaateqarfiatalu aalajangiineri sap.ak. 4-t qaangiutsinnagit Naalakkersuisunut naammagittaalliuutigineqarsinnaapput. Naalakkersuisut aalajangiivitsinnagit Katersugaasiveqarnermut Ataatsimiititaliaq oqaaseqaateqartinneqaqqaassaaq.

**§ 38.** § 27, imm. 3-mik 4-millu, § 28, imm. 1-imik, § 28, imm. 2-mi oqaaseqatigiinnik siullernik, § 28, imm. 3-mi oqaaseqatigiinnik siullernik tulliinillu, § 28, imm. 4-mik, § 29, imm. 2, oqaaseqatigiit siulliannik, § 32-mik aamma § 33, imm. 1-imik unioqquitsineq akiliisitsissutaasinnaavoq.

*Imm. 2.* Aalajangersakkanik unioqquitsisoqartillugu akiliisitsisarnissaaq pillugu maleruagassat maleruagqusani Inatsisartut inatsisaat naapertorlugu atuutilersinneqartuni aalajangersarneqarsinnaapput.

*Imm. 3.* Akiliisitsinissaaq Inatsisartut inatsisaatigut maleruagqusaniluunniit Inatsisartut inatsisaat naapertorlugu atuutilersinneqartutigut tunngavissaqarpat, inatsisit naapertorlugit inatsisitigut pisusaatitaasoq Kalaallit Nunaanni pinerluttulerinermik inatsimmi maleruagassat naapertorlugit akiliisitsissummik akileeqquneqarsinnaavoq.

*Imm. 4.* Akiliisitsissut nunatta karsiata pisassaraa.

## Kapitali 8

### *Atuutilerfia ikaarsaariarnermilu aalajangersakkat*

§ 39. Inatsisartut inatsisaat aggustip aallaqqaataani 2015-imi atuutilerpoq.

*Imm. 2.* Tamatuma peqatigisaanik atorunnaarsinneqarput Katersugaasiveqarnej pillugu Inatsisartut peqqussutaat nr. 6, 30. oktober 1998-imeersoq kingusinnerusukkut allannguuteqartoq, kiisalu Kulturikkut ingerlatsineq sunngiffimmilu sammisassaqaartitsineq pillugit Inatsisartut peqqussutaanni nr. 10, 21. maj 2002-meersumi § 30, imm.1, nr. 9.

*Imm. 3.* Maleruagassat Katersugaasiveqarnej pillugu Inatsisartut peqqussutaat nr. 6, 30. oktober 1998-imeersoq kingusinnerusukkut allannguuteqartoq naapertorlugu aalajangersarneqarsimasut atuutsiinnarneqarsimasulluunniit, Inatsisartut inatsisaat una inatsisilluunniit allat naapertorlugit maleruagassiatigut atorunnaarsinneqarnissartik taarserneqarnissartilluunniit tikillugu atuutiinnassapput.

*Namminersorlutik Oqartussat, 3. juni 2015*



Kim Kielsen